

**Ileqqoreqqusat  
uunga**

**TEKNIKIMIK ILINNIARFIK**

**Kapitali 1**

**Aqqa. najugaqarfia aamma siunertaa**

§ 1. TEKNIKIMIK ILINNIARFIK tassaavoq ilinniartitsinerit pisortat suliffeqarfiutaat nammineq ingerlatsisoq Naalakkersuit nalinginnaasumik ilitersuisinnaatitaanerisa avataanniittoq, tak. Inuussutissarsiutinik ilinniartitsinerit aamma Inuussutissarsiutinik ilinniartitsinerup iluani pikkorissaanerit pillugit Inatsisartut inatsisaat nr. 10, 19. maj 2010-meersoq.

*Imm. 2.* TEKNIKIMIK ILINNIARFIK Sermersuup Kommuneqarfiani (Nuuk) aamma Qeqqata Kommuneqarfiani (Sisimiut) angerlarsimaffeqarpoq

§ 2 Ilinniarfimmut siunertaavoq Naalakkersuisut maleruaqqusat aalajangersagaat tunngavigalugit Inuussutissarsiutermin ilinniartitaanernik neqerooruteqarnissaq, kiisalu tamanna pillugit inatsisit atuuttut malillugit. Ilinniarfiup ilinniartitaanernik neqerooruteqarnera atuuttoq naalakkersuisoqarfiup aamma siulersuisut atsiugaanni angusaqarnissamik isumaqatigiissumi sukkulluunniit atuuttumi takuneqarsinnaavoq.

*Imm. 2.* Ilinniarfik ilinniartitaanernut attuumassuteqartunik, tak. imm. 1, ingerlatsinerinik allanik ingerlataqarsinnaavoq tamatumani siunertaralugu ilinniarfiup Inuussutissarsiutitigut ilinniartitaanernut attuumassuteqartunut tunngatillugu immikkut suliatigut ilisimasaqarnera atorluarniarlugu, tamatumunnga ilanngullugit siunnersuinerinik aamma sullissinerinik allanik neqerooruteqarnikkut. Ilinniarfiup ingerlatsinera alla niuernermin unammillersinnaanermut atugassarititaasut malillugit ingerlanneqassaaq.

*Imm. 3.* Ilinniarfimmut taamatuttaaq siunertaavoq allaffissornikkut suliassanik aalajangersimasunik isumagisaqarneq, tak. inatsit aamma isumaqatigiissutit atuuttut.

*Imm. 4.* Ilinniarfimmit ineriartortinneqarsinnaapput aamma ingerlanneqarsinnaapput suliaqarnermi politikkimut tunngaveqartumik ingerlatsinerit.

*Imm. 5.* Ilinniarfimmut taamatuttaaq siunertaavoq, Inuussutissarsiutinik Ilinniartitaanermut Naalakkersuisoqarfiup akuersissuteqarnerata kingornatigut kollegiaqarnerinik ingerlatsinissaq.

**Kapitali 2.**

**Siulersuisut katitigaanerit**

§ 3. Ilinniarfik siulersuisunik arfineq marlunnik ilaasoqartumik taasisinnaatitaasunillu aqunneqarpoq, taakku imatut toqqarneqartarput:

1) ***Ilaasortat sisamat Sulisitsisunit ataatsimoortumik toqqarneqassapput. Toqqaasinnaaneq sulisut, kattuffiit sinniisuuffigisaat, ukiumut sulisarnerat naatsorsorlugu agguataarneqassapput.***

2) ***Sulinermin Inuussutissarsiuteqartut Kattuffiat ilaasortamik ataatsimik toqqaassaaq.***

3) ***Ilinniartitaanermut Naalakkersuisoqarfik ilaasortanik marlunnik toqqaassaaq***

***forständerip isumasioreerneratigut.***

*Imm. 2.* Siulersuisut sapinngisamik arnat angutillugu naligiissinniarlugit katitigaasariaqarput.

*Imm. 3.* Siulersuisuni sulisitsisut aamma sulinermik inuussutissarsiuteqartut ilinniarfiup nunami sumiiffiani attuumassuteqassapput aamma suliaqarfimmut ilinniarfiup sammisaqarfianut, taamatuttaaq sinniisuutitap pineqartup ilinniarfiup ataatsimoortumik ingerlatsiffigisaa matussusertariaqarlugu.

*Imm. 4.* Atorfeqartut aamma ilinniartitaanermi ilinniarfimmi peqataasut siulersuisunut ilaasortatut toqqarneqarsinnaanngillat. Taamatuttaaq inuussutissarsiornermut ilinniarfinni allani aqutsisutut atorfillit imaluunniit allaffissornermi atorfillit allat tamatumani pineqarput.

*Imm. 5.* Ilinniarfiup aqutsisua, tak. § 13, siulersuisunut allattaavoq aamma siulersuisut ataatsimiinneranni taaseqataasinnaanani peqataasarpoq.

*Imm. 6.* Ilinniarfiup ilinniartitsisui aamma teknikimi allaffissornermi sulisui siulersuisuni ilaasortamit sinniisuutitaqassapput taaseqataasinnaanngitsumik.

*Imm. 7.* Inatsisartuni imaluunniit kommunalbestyrelsini ilaasortat siulersuisuni ilaasortaasinnaanngillat.

**§ 4.** Siulersuisuni ilaasortat ataatsimoorlutik ilinniarfiup siunissami atuunnissaa siuarsassavaat inuussutissarsiutini ilinniartitaanernut aamma suliaqarfiup ilinniartitaanernik atorfissaqartitsinerannut tunngatillugu misilittakkatik aamma ilisimasatit atorlugit.

*Imm. 2.* Siulersuisut ataatsimoorlutik ilinniartitsinikkut ineriartortitsineq, pitsaassutsimik qulakkeerinninneq, aqutsineq, ilinniarfiup aqqissuussanera aamma aningaasaqarna ilisimasaqarfigissavaat, taakkununga ilanngullugit missingersuutini aamma naatsorsuutini naliliinerit aammattaaq inuutissarsiutini ilinniartitsinermi pitsaassutsimik ilisimasaqarneq.

**§ 5.** Ilaasortat ukiuni 4-ni atasussatut toqqarneqartassapput.

*Imm. 2.* Ilaasortat toqqarneqaaqqissinnaapput

*Imm. 3.* Siulersuisunut ilaasortaq ilaasortaanissamut aalajangersakkanik piviusunngortitsisinnaajunnaaruni ingerlaannaq siulersuisunit tunuassaaq.

Toqqaasinnaatitaasoq ilaasortaasussamik nutaamik piaarnerpaamik toqqaassaaq atuuffissami sinneruttumik atuuttuusussamik.

### **Kapitali 3**

#### **Siulersuisut suliasat aamma akisussaaffii**

**§ 6.** Siulersuisut ilinniarfiup qullersaasutut oqartussarai ilinniarfiullu ingerlanneranut qullersaasutut akisussaallutik, ilinniarfiup suliamut tunngasutigut aamma aningaasaqarnikkut ingerlassai ilanngullugit aamma Namminersorlutik Oqartussanit aningaasaliissutini aqutsinermut.

*Imm. 2.* Siulersuisut ilinniarfiup ilinniartitsinerni aamma ingerlatsinerni attuumassuteqartuni piffissamut qanittumut aamma ungasissumut anguniagassai aamma siunissamut pilersaarutai aalajangersassavaat.

*Imm. 3.* Ilinniarfiup aqutsisuata inassuteqareerneratigut, ilinniarfiup ingerlatsinissaanut ukiumoortumik pilersaarut siulersuisut aalajangersartassavaat.

**§ 7.** Siulersuisut sulissutigissavaat ilinniarfiup ilinniartitaanerni, siunnersuinerni aamma sullissinernik allanik ingerlatsinissaa, tassuuna ajorunnaarsissallugu inuussutissarsiornermi

ilinniartitaanera tamatumunnga ilanngullugu ilinniagaqarniartut aamma suliffeqarfiit akornanni ilinniarsimasani pikkorissarnissat aamma ilinniagaqaqqinnissat sapinngisamik annertunerpaamik sallitinneqarnissaat. Ilinniarfiup aqutsisuata inassuteqareerneratigut, siulersuisut ilinniartitaarni aqutissuussinernik aallartitsinissaat aamma isertitaqarfiusunik ingerlatsinermut tunngatillugu, kiisalu ingerlatsinerit allat naapertuuttut pillugit alajangiisassapput.

*Imm. 2.* Siulersuisut Naalakkersuisunut akisussaassuseqarput ilinniartitaanerit ilinniakkatigut pitsaassusiannut, tassunga ilanngullugit ilinniartitaanerit imarisaat, ilinniartitaanernik nutaanik aallartitsinerit, ilinniakkanut ataasiakkaanut tunngasunik ilinniartitaanermi pilersaarusiornertit, sungiusarluni sulinissamut pilersaarusiornertit ataatsimoortumik aalajangersarneqarnissaa aamma iliniakkani misilitsinnerujunnartunut maleruagqusanik aalajangersaaneq.

*Imm. 3.* Siulersuisut Naalakkersuisunut akisussaassuseqarlutik makku pillugit aalajangiisassapput:

- 1) suliffeqarfiit sungiusarluni suliffissatut akuersissutigineri,
- 2) sungiusarluni sulineri ilinniartinneqarneq,
- 3) nunani allani sulisimanerup akuersissutigineri,
- 4) suliamut tunngatillugu misilitsinnerit ingerlanneqarnerat,
- 5) ilinniarsimasat ilinniakkamut allamut nuussinnaanernik aamma piffissap ilinniartitaarni sivikillinissaanik sivitsornissaanilluunniit aamma ilinniartut ilinniagaq suliarluunniit alla tunngavigalugu ilinniartitaarni ilinniarsimasat sungiusarlutilluunniit sulillutik ilinniartitaarni sivikillisaanneqarsinnaanerannik akuersissuteqarnerit.

*Imm. 4.* Siulersuisut ataatsimik amerlanerilluunniit ilinniartitaanermut ataatsimiititalianik pilersitsisinnaapput tassunga ilanngullugit ilinniartitaanermut ataatsimiititaliaagallartartussat, ilinniartitaanerit suliamut tunngatillugu imarisaat aamma pitsaassutsikkut killiffii kiisalu ilinniartitaanerit suliffeqarfiit pisariaqartitaannut politikkikkullu anguniakkanut naleqqiullugu qanoq naapertuutsiginerat pillugit siunnersuisarnissaq siunertaralugu.

**§ 8.** Siulersuisut aningaasat aningaasaliissutigineqartut aqussavaat taamaalillutik ilinniartitaarni siunertaanut sapinngisamik pitsaanerpaamik iluaqutaanissaat siunertaralugu. Siunertap tamatuma aamma atugassarititaasut iluanni, tassa inatsisikkut imaluunniit taassuma nassatarisaanik aalajangersakkat iluanni, siulersuisut kiffaanngissuseqarlutik Namminersorlutik Oqartussanit aningaasaliissutitup tapisiani aamma isertitanik allanik ataatsimut atuisinnaatitaapput.

*Imm. 2.* Siulersuisut ulluinnarni ilinniartitsineq sunniuteqarfigissanngilaat, kisianni ilinniartitaarni ingerlatsinerani qullersaasutut maleruagassanik aalajangersaassapput.

**§ 9.** Siulersuisut ilinniartitaarni aqutsisuanik atorfinitsitsillutillu soraarsitsisarput, taamaattoorli tak. § 23, imm. 2.

*Imm. 2.* Siulersuisut aqutsisup ingerlatsinissaa pillugu erseqqinnerusunik maleruagassiussapput aamma aqutsisumik pisinnaatitsisinnaapput erseqqinnerusumik annertussusilikkamik aamma siulersuisut akisussaassuseqarfigisaannik siulersuisut pisinnaatitaanerannik ingerlatsisinnaatillugu.

*Imm. 3.* Siulersuisut akissarsiat aamma atorfeqartitaanermi atugassarititaasut, tassunga ilanngullugit soraarnerussutisiaqalernissamut atugassarititaasut malissavaat, tassa Namminersorlutik Oqartussani atorfeqartinneqartunut atuuttut, imaluunniit atuarfimmi sulisunut isumaqatigiissutaasimasut.

## **Kapitali 4**

### **Siulersuisut sulinerat**

**§ 10.** Siulersuisut akunnerminni siulittaasumik aamma siulittaasup tullianik toqqaassapput.

*Imm. 2.* Siulittaasoq taassumalu peqannginnerani siulittaasup tullia ataatsimiigiaqqusisassaaq aamma siulersuisut ataatsimiinnerannik aqutsisuussalluni. Ikinnerpaamik ukiumut sisamariarluni ataatsimiittoqartassaaq.

Immikkut ittumik ataatsimiinnerit ingerlanneqarsinnaapput siulittaasoq taamatut pisariaqartitsinermik isumaqarpat imaluunniit ikinnerpaamik siulersuisuni ilaasortat affaasa imaluunniit forständerip tamanna piumasaqaatigippagu.

*Imm. 3.* Siulersuisut aalajangiisinnassuseqarput ilaasortat taaseqataasinnassut ikinnerpaamik affaat najuuppata. Aalajangiinnerit nalinginnaasumik amerlanerussuteqarnikkut aalajangerneqartarput. Taasinerit naligiissagaluarpata siulittaasup, taassumalu peqataannginnerani siulittaasup tullia taasina aalajangiisuvoq.

*Imm. 4.* Siulersuit aalajangersaanerat imaqarniliorneqassaaq siulersuisuni ilaasortanit tamanit atsiorneqartussamik. Siulersuisunut ilasortap ataatsimiinnermut peqataasimanngitsup imaqarniliamut atsiordermini toqqarsinnaavaa “takuvaa aamma atuarpara” uunga “akuerivara” taarsiullugu.

Siulersuisunut ilaasortap siulersuisut aalajangersaaneranut isumaqataanngitsoq pisinnaatitaaffeqarpoq nammineq isummani imaqarniliamut ilannguteqqussallugu.

*Imm. 5.* Siulersuisut ataatsimiinneri matoqqasuupput. Siulersuisut ataatsimiissutissaat, tassunga ilanngullugit ullormut oqaluuserisassat aamma imaqarnialiaq, tamanut saqqummiunneqartassapput. Suliat, uppersaasarsuutit imaluunniit paasisutissat, taamaattorli pisortat ingerlatsineranni suliaasat suliarineqartarnerat pillugu inatsimmi nipangiussisussaataannermut aalajangersakkanut ilaatinneqartut, saqqummiuteqqusaanngillat. Suliat inunnut tunngasut aamma suliat, taakkunani ilaallutik isumaqatigiissutissamik isumaqatigiinniarnert namminersortunik imaluunniit pisortat suliffeqarfiinik isumaqatigiinniarnert tamatumunnga assingusut, tamanut saqqummiussinnermut ilanngunneqarnissaat pinngitsoorneqarsinnaavoq, suliap qanoq ittuunera tunngavigalugu tamanna pisariaqartutut isigineqarpat.

*Imm. 6.* Siulersuisut aalajangissavat ilasortaq imaluunniit inuk, siulersuisut ataatsimiinneranni peqataasoq pisortat ingerlatsineranni suliaasat suliarineqartarnerat pillugu inatsimmi peqataasinnanninnermut maleruaqqusanut ilaatinneqarnersoq.

**§ 11.** Siulersuisut ajunngitsorsiassaqartinneqassapput Namminersorlutik Oqartussat tamanna pillugu maleruaqqusaliaat tunngavigalugit.

*Imm. 2.* Siulersuisunut ilasortat angalanerminnut aningaasartuutaat aamma toqqagaanerminnut tunngatillugu aningaasartuutaat allat atuarfimmit aningaasartuutigineqassapput, Namminersorlutik Oqartussani atorfimmuut atatillugu angalanermi aningasartuutit pillugit maleruaqqusat tunngavigalugit.

**§ 12.** Siulersuisut suleriaasissartik namminneq aalajangersassavaat. Suleriaasissami minnerpaamik aalajangersarneqassapput makku:

- 1) Siulittaasup aamma siulittaasup tullia suliaasat.
- 2) Siulersuisut aamma ilinniartuup aqutsisuata akornanni suliaasat agguarneqarnerat pillugu maleruaqqusat.
- 3) Siulersuisut ilinniartuup aqutsisuanik nakkutilliinerat pillugu maleruaqqusat.

- 4) Ilinniarsiup anguniagassanik aamma ilinniartitaanermut siunissamut kiisalu ingerlatsinerni attuumassuteqartuni piffissamut qanittumut aamma ungasissumut tunngatillugu pilersaarutaanik nalunaarutitut malinnaaffiginninneq pillugu siulersuisunut maleruaqqusat.
  - 5) Siulersuisut ilinniarsiup aaqqissuussanera, pitsaassutsimik qulakkeerinninneq, naatsorsuuserisoqarfia, sulliffeqarfimmi namminermi misissuineq, IT pillugu aaqqissuussanera aamma missingersuusiortanera pillugu isummernissaminut pisussaaffeqarnera.
  - 6) Siulersuisut pisussaaffigigaat paasissutissat pissarsiarissallugit tamakku suliasamik naammassinissaannut pisariaqarpata.
  - 7) Pilersaarutit, ilinniarfimmi namminermi aamma avataani nalilersuinerit, missingersuutit aamma assigisaat taamatuttaaq ilinniarsiup ilinniartitaanermi angusa pillugit, aningaasaatai tigoriaannaat, ingerlatsinermi ineriartortitsinera, aningaasalersuineri pissutsit, aningaasat kaaviiarnera il. il. malinnaaffiginissaat siulersuisut pisussaaffigigaat.
  - 8) Siulersuisut pisussaaffigigaat isummerfigissallugu kukkunersuisut oqaaseqaataat, taassuma atsiorneqarnissaa sioqqullugu.
  - 9) Siulersuisut pisussaaffigigaat atuarfiup piffissamut aalajangersimasumut naatsorsuutai aamma assigisani misissussallugit, ukiup naatsorsuusiortiusut ingerlanerani aamma tassunga atatillugu missingersuutit nalilersussallugit aamma taakkunani allannerussutaasut.
  - 10) Siulersuisut pisussaaffigigaat qulakkiissallugu kukkunersuineri tunngavissat pisariaqartut pigineqarnissaat.
  - 11) Siulersuisut pisussaaffigigaat suleriaatsinik pilersitsissallutik taakku qulakkeerinnissapput aningaasaliissuteqartut paasissutissanik pissarsinissaanut, tassa inatsimmi atuuttumi aalajangersakkat tunngavigalugu ilinniarsiup ingerlanerani malinnaaffiginninnissamut.
- Imm. 2.* Suleriaasissaq Inuussutissarsiutinik Ilinniartitaanermut Naalakkersuisoqarfimmut ilisimatitsissutitut nassiunneqassaaq.

## **Kapitali 5**

### **Ilinniarsiup ulluinnarni aqutsisui**

**§ 13.** Atuarfiup aqutsisua ulluinnarni atuarfimmi aqutsisuuvoq aamma siulersuisunut akisussaasuuseqarpoq. Atuarfiup aqutsisuata qulakkiissavaa atuarfiup aqunneqarnissaa tamanna pillugu maleruaqqusat atuuttut aamma siulersuit maleruaqqusat aalajangersagai tunngavigalugit.

*Imm. 2.* Atuarfiup aqutsisuata atuarfiup sulisuinik atorfinitsitsisartuuvoq aamma soraasitsisartuulluni, taakkununga ilanngullugit atuarfimmi aqutsisut sinneri.

*Imm. 3.* Atuarfiup aqutsisuata atuarfiup ulluinnarni ingerlanneqarnerni maleruaqqusanik sukumiinerusunik aalajangersaassaaq.

*Imm. 4.* Aqutsisoq atsiorsinnaatitaanerut maleruaqqusaasut, siulersuisunit aalajangersarneqarsimasut malillugit, ukiumoortumik siulersuisunut siunnersuuteqassaaq ukiumut missingersuutinik aamma ilinniarfimmi ilinniartitaanernut aamma ingerlatsinernut attuumassuteqartunut tunngasunik.

## **Kapitali 6**

### **Atsiorsinnaatitaanermut pisinnaatitaaffik**

§ 14. Ilinniarfik sinnerlugu siulersuisut siulittaasuat aamma ilinniarfiup aqutsisua ataatsimoorlutik imaluunniit tamanna pisinnaanngippat taakku arlaat siulersuisuni siulittaasup tullia peqatigalugu.

## **Kapitali 7**

### **Aningaasalersuineq, missingersuutit, naatsorsuutit aamma kukkunersuineq**

#### *Aningaasalersuineq*

§ 15. Atuarfiup ingerlanneqarnera Landskarsimik tapiissuteqarnikkut aningaasalersorneqarpoq aamma ingerlatsinernit allanit isertitaqarnikkut, tamatumunnga ilanngullugu ingerlatsinerit isertitatigut matussuserneqartartut aqutigalugit tak. inatsit aamma isumaqatigiissutit atuuttut.

*Imm. 2.* Landskarsimit ukiumoortumik tapiissut Inatsisartunit Aningaasaqarnermut Inatsisip ukiumut aningaasaliiffiusumut tullermut akuersissutigineqarneratigut aalajangersarneqartarput, tak. inatsit aamma isumaqatigiissutit atuuttut.

#### *Missingersuutit*

§ 16. Siulersuisut ukiut tamaasa Naalakkersuisunit kingusinnerpaamik piffissarititaasoq qaangiutsinnagu, Naalakkersuisunut missingersuutinik tunniussisarpaq ukiumut aningaasaliiffiusussamut tulluuttumut, tassunga ilanngunneqartarput isertitassatut, ingerlatsinermi aningaasartuutissatut aamma sanaartornermit aningasartuutissatut missingiutit aammattaaq pigisat nalillit aamma akiisut ukiup naanerani killiffiat ilanngullugu, Tamatumunnga ilutigittillugu siulersuisut siunnersuutigisarpaat ukiumut aningaasaliiffiusussamut ataaneqartumut tapiissutit annertussusissaat, tak. inatsit aamma isumaqatigiissutit atuuttut.

*Imm. 2.* Missingersuutit suliarineqartarput Namminersorlutik Oqartussat missingersuusiornermut malittarisassaasut sukkuunniit atuuttoq tunngavigalugu. Immikkut nassuiaassutigineqartarput nammineq isertitarisinnaasatut naatsorsuutigisat aamma aningaasartuutit tamatumunnga attuumassuteqartut.

*Imm. 3.* Missingersuutinit siunnersuummi ilanngunneqassapput kingullermik missingersuutinit naleqqiussilluni allannguutaasut aamma siusinerusukkat missingersuutinit missingiutinit naleqqiussilluni. Siunnersuummut ilanngunneqartarput missingersuutinit missingiutit ukiunut pingasunut tulluuttunut tunngasut. Missingersuutinit siunnersuut aamma missingersuutinit missingiutinit ilanngunneqassapput missingersuusiornermut piumasaqaatinut nassuiaassutitit makkuusut: Sanaartornermut aningasartuutit ilaappata ilisimatitsissutigineqassaaq aningaasartuutit atuarfiup ataatsimut piffissami missingersuusiolfiani aningaasalersuineri pilersaarutaanut taakku qanoq ilanngunneqarsimanerat. Ingerlatsinermut aningaasartuutit eqqarsaatigalugit taakku piffissaq missingersuusiolfiusoq tamakkerlugu, kingullermi ukiumoortumik naatsorsuutinit naleqqiussilluni, ilisimatitsissutigineqassapput ilinniartitaanernik ingerlatsinnissat qanoq pilersaarusiorneqarsimanersut taakku pingaarnernut immikkoortiterlugit. Inaarutaasumik missingersuutinit missingiutini immikkut nalilersuisoqassaaq nammineq isertitassat pillugit naatsorsuutigisat ineriartornissaat.

§ 17. Siulersuisut missingersuutit ataatsimoortut ilaattut siunnersuummik tunniussissapput immikkut missingersuutininik ingerlatsinermut allamut tunngasumik, tamatumunnga ilanngullugu missingersuutit ingerlatsinermut allamut tunngasut suussutsinut ataasiakkaarlugit, tak. inatsit aamma isumaqatigiissutit atuuttut.

§ 18. Naatsorsuutitigut sinneqartoorutit imaluunniit amigartoorutit aningaasaqarnermut inatsimmi kisitsit aalajangerneqarsimasoq tunngavigalugu ukiumut aningaasaliiffiusumut tulluuttumut illuartinneqassapput.

§ 19. Inatsisartut aningaasaliissutit akuersissutigisimasaat mianeralugit siulersuisut ukiumut aningaasaliiffiusumut tulluuttumut missingersuutininik suliarinnittarput. Missingersuutit Inuussutissarsiutinik Ilinniartitaanermut Naalakkersuisoqarfimmut ilisimatitsissutitut nassiunneqartarput ukiup aningaasaliissuteqarfiusup aallartinnginnerani.

#### *Naatsorsuutit*

§ 20. Atuarfiup ukioq naatsorsuusiortia tassaavoq ukiumut aningasaliissuteqarfik. Ilinniartfiup ukioq naatsorsuusiortia tassaavoq ukioq aningaasaliiffiusoq. Ilinniartfiup aalajangersakkat missingersuusiortarneq, naatsorsuuserineq naatsorsuutinillu saqqummiussisarneq pillugit Namminersorlutik Oqartussanut sukkulluunniit atuuttut maleruassavaat, tak. inatsit aamma isumaqatigiissutit atuuttut.

*Imm. 2.* Siulersuisut atuarfiup naatsorsuusiortarneranut ilitersuutit aalajangersassavaat, tak. inatsit aamma isumaqatigiissutit atuuttut.

*Imm. 3.* Naatsorsuutit imarissavaat ilinniartfiup ilinniartitsinermik ingerlatsineranut aamma allatigut ingerlatsineranut immikkut naatsorsuutit, allatigut ingerlatat ataasiakkaat pillugit immikkut naatsorsuutit ilanngullugit, tak. inatsit aamma isumaqatigiissutit atuuttut.

#### *Kukkunersiuineq*

§ 21. Ukiumoortumik naatsorsuutit Namminersorlutik Oqartussat kukkunersuiisuinit kukkunersiorneqartassapput, tak. inatsit aamma isumaqatigiissutit atuuttut.

*Imm. 2.* Inuussutissarsiutinik Ilinniartitaanermut Naalakkersuisoqarfiup piffissarititaasutut killiussaa nallertinnagu naatsorsuutit kukkunersiuineqarsimasut siulersuisut saqqummiutissavaat, tassunga ilanngullugit kukkunersuiusut oqaaseqaataat, Naalakkersuisoqarfimmut akuersissutigineqartussanngorlugit, tak. inatsit aamma isumaqatigiissutit atuuttut.

*Imm. 3.* Siulersuisut Inuussutissarsiutinik Ilinniartitaanermut Naalakkersuisoqarfiup naatsorsuutinik saqqummiussinerminnut ilutigitillugu naatsorsuutit tamanut saqqummiutissavaat, tak. inatsit aamma isumaqatigiissutit atuuttut.

### **Kapitali 8**

#### **Akissarsiat atorfeqartitaanermilu atugassarititaasut**

§ 22. Atorfinitsitsinermi atugassarititaasunut aamma pissutsinut allanut tunngatillugu, atorfeqartitaanermi atugassarititaasuni aamma soraarsitsinerni atuarfik pisussaataaavoq aalajangersakkat malissallugit, tassa Kalaallit Nunaanni Namminersorlutik Oqartussani sulisunut

sukkulluunniit atugassarititaasut, tak. inatsit aamma isumaqatigiissutit atuuttut.

*Imm. 2.* Atorfinitsitsinernut aamma soraarsitsinernut atatillugu sutigut tamatigut pisortat ingerlatsineranni suliaasat suliarineqartarnerat pillugu ingerlatsinermi inatsisitigut maleruaqqusat malinneqassapput.

*Imm. 3.* Killiussat imm. 1-imi taaneqartut iluanni periarfissaqarpoq allannortitsisinnaanerp killeqartup iluani tapiliussatut aalajangersaasinnaanernik kattuffiit isumaqatigiissutaasa aamma isumaqatigiissutit isumaqatigiissutigineqareersimasut iluanni aamma periarfissaavoq atorfiit nutaat kiisalu suliaasat pillugit piviusumik isumaqatigiinniarsinnaaneq periarfissaavoq, tamakku ataatsimoortumik aalajangersakkanit akissussaaffimmut aamma piginnaasaqarnernut il. il. malunnaateqarluartumik allaaneruppata.

## **Kapitali 9**

### **Atuutilernera**

**§ 23.** Ieqqoreqqusaq manna atuutilerpoq Inuussutissarsiutinik Ilinniartitaanermut Naalakkersuisoqarfiup akuersissuteqarneratigut.

*Imm. 2.* Aalajangersagaq § 9, imm. 1-imiittoq aqutsisunut atuutinngilaq, taakku 1. januaari 2011 sioqqullugu atorfinitsinneqarsimappata.

*Imm. 3.* Ieqqoreqqusaq allannortinneqarsinnaanngilaq Inuussutissarsiutinik Ilinniartitaanermut Naalakkersuisoqarfiup akuersissuteqaqqaartinnagu.

.....

Nutarterlugu allannortitaq manna siulersuisunit akuersissutigineqarpoq ulloq 30. januaari 2014.